



29. januar 2015

EM 2015/40

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiunneqarpoq:

Innuttaasut pisariaqartitsilernerni ukioq kaajallallugu kigutigissaasoqarfiunngitsuni najugaqartut tassanngaannartumik suliaritittariaqartut isumagineqarfissaminnut qaninnermut angalanissaminnut akiliutissaannik ikiorserneqarsinnaaqqullugit Peqqinnissaqarfiup sullissineri il.il. pillugit Inatsisartut peqqussutaata nr. 15-ip, 6. november 1997-imeersup allanngortinnissaanik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Juliane Henningsen, Inuit Ataqatigiit)

Tungavilersuut:

Kigutigissaanerup iluani kiffartuussinernut nunatsinni innuttaasunut maannaminngarnit annertunerusumik periarfissiinissarput naalakkersuinikkut aaqinneqarnissaa kissaatigaara.

Nunatsinni innuttaasut kigutigissaanermik atuinissaminnut assigiinngitsorujussuarnik periarfissaqartitaapput. Inuiaqatigiinnili kikkorpasuit najugaqarfimminni tassanngaannaq pisoqartillugu periarfissaqartitaanngillat. Tamatumani nunatsinni nunaqarfippassuarni najugartut eqqarsaatigineruakka.

Kigutigissaasut nunaqarfinnut ukiumut ataasiarlutik tikittarnissaat anguniagaraarput. Taamatut angalasarnerit akulikinnerulersinnissaat eqqarsaatigineqarsinnaavoq, nunaqarfinnulli tikittarnerit amerlinerisigut kigutitigut peqqinnerulernissaq Naalakkersuisuni maannamut isumaqarfigineqanngilaq, tamassumalu saniatigut sulisut amerliniaraanni pissarsiornissap ajornakusoornissaa oqaatigineqarluni.

Ullormut arlaleriarluta kigutitta salittarnerisigut, tungusunnitsunik atuinitta annikillineratigut pujortarunnaarnikkullu nammineerluta kigutivut kusanaqqissaartillugillu paarilluarsinnaavagut.

Taamaalioralaruttaluunniilli tassanngaannaq pisoqariataarsinnaasarpoq, taavalu kigutileriffimmukartariaqarneq pisariaqalersinnaalluni. Soriatarnikkut kigut napisinnaavarput il.il. Taamatut tassanngaannartumik pisoqariataarnera ulloq taanna kigutit nakorsaata tikeraarnera eqqorlugu pinngippat nunaqarfimmi najugaqartuulluni ajornartorsiutaalissaaq.

Ullumikkut inatsisit atuuttut naapertorlugit aatsaat tassanngaannaq nappaammik peruluttoqalerneranut sanillunneqarsinnaasumik kigutitigut ajoquteqartoqalersillugu innuttaasut nunaqarfinni najugaqartut illoqarfimmi kigutileriffimmut ingerlasariaqassappata angalanermut aningaasartuutiminnik taarsiivigineqarsinnaapput. Allatigut nalinginnaasumik tassanngaannartumik pisoqariataassappat angalanissanut aningaasartuutigisanik taarsiivigineqarnissamut periarfissaqartitsisoqanngilaq.

Najoqqutassat ingerlatseriaatsillu ersarissarnerisigut innuttaasunut ulluinnarni kigutigissaasioqanngitsuni najugaqartut pisariaqartitseriataarnerni angalasariaqarnerminnut aningaasartuutiminnik taarsiivigineqarsinnaanissaat matumuuna siunnersuutigissavara.

Pisortanut aningaasatigut allaffissornikkullu kingunerisassat:

Ingerlatseriaasiornerit, najoqqutassiornerit, oqalutseqarnissat, taamatullu allaffissornikkut maleruagassanik atuuttunik allannguinnissat A/C fuldmægtig-ip ukiup affaani sulisariaqarnissaanik naatsorsorneqarpoq, imaappoq 250.000 kr missaat.

Ilaqutariinnermut Peqqissutsimullu Ataatsimiititaliap siuliata taamani peqqissutsimut Naalackersuisuusoq isumasioqatigiinnissamut 9. September 2013 aggersarparaa, siunnersuutip matuma piviusunngortinnissaata aningaasaqarnikkut kingunerisassai pillugit.

Taamani Naalackersuisoq angallassinermut aningaasartuutit pineqartut matussusernissaannut atatillugu ilimagisaasut pillugit ima ilisimatitsivoq:

”Nunaqarfimmiut qassit piffissap aalajangersimasup iluani tassanngaannartumik kigutigissaasuliarnissamik pisariaqartitsisimanersut takussutissiaqanngilaq, illoqarfinnullu ikiorserneqaqqullutik namminneq takkuttartut pisariaqartitsigaluartunut naleqqiullugu ikinnerunissaat ilimanarpoq. Taamaammat ataatsimoortumik aningaasat annertussusiisa nalunaarutiginnissaat ajornarpoq. Kisianni qularutissaanngilaq tassanngaannartumik kigutit nakorsiarnissamik pisariaqartitsilernerit (kiguserinermi, aseruuttoornermi il.il.) pissutigalugit nunaqarfimmiit illoqarfimmut angalanermut akiliunneqarnissamut periarfissiisoqassappat, pissutsit nakkutigiuminaatsut aningaasaqarnikkullu piumasaqaatitaqartut ammaanneqassasut.

Taamaammat tulleriiarisarnissaq pinngitsoorneqarsinnaassanngilaq.”

Namminersorluni inuussutissarsiteqarnermut aningaasatigut allaffissornikkullu kingunerisassat:

Soqanngilaq.

Innuttaasunut aningaasatigut allaffissornikkullu kingunerisassat:

Soqanngilaq.